



鄭少谷先生全集卷八下

閩中鄭善夫繼之著

後學鄭奎光章甫訂

五言絕句

宋宮故基

西門數頃地舊是帝王宮  
莫謾歌禾黍山河涕淚中

病居讀顧與新詩

伏枕殊方客秋風歲戴陰  
頭風頓覺愈吾只愛

陳琳

少谷集

卷八下

楚客

楚客望不返行坐楚天心荆門未可涉洞庭波  
正深

冬青樹

道傍冬青樹人好樹亦好豈不纏風雷青青自  
持保

子夜變歌三章

洪江通海潮朝往復暮來出水下洪江何時逐  
潮回

我欲渡螺江螺女不可遇人知子夜來不知子  
夜去

漢王昔垂釣白龍從天來至今龍起處猶傍漢  
王臺

東園

汶口園仍好商於草已蕪誰歌採芝曲高調滿  
江湖

柴門二首

涼月光不了照我芳桂叢白鳥如人長來往柴

門東

家住白湖陽習見風波事  
若荻何蒼蒼亂我蘭  
與芷

題畫

商意變綠荷秋風落江渚  
零露忽泥人愁聞鵲  
鴿語

吳中雜詩二首

秋浦下鴻鴈秋風鳴芰荷  
客懷一萬里江月夜  
如何

烏衣不復見蟋蟀聲近牀  
黃花深幾許昨夜一  
籬霜

江行五首

冰合如鏡平冰斷如雷鳴  
孤舟不得寐枕上悲  
風生

厭見雪如麻不見梅放花  
江北是客路江南是  
客家

閉門對孤燈開門見明星  
默默心底事礪礪誰  
能平

宦海多白波客路多黃塵波白解覆舟塵黃解  
汚人

少年愛春日羯鼓鬧春盤一自不家食春盤歲  
歲閒

漫吟三首

浣紗傷妾貌折花傷妾心郎君不相棄請聽白  
頭吟

白頭人所賤綠髮人須戀君如戀綠髮莫到白  
頭變

愛君如愛天事君期盡年妾意無虛假君看塘  
上篇

古意

誰家玉面女素足立水傍睠言新歲近作意浣  
衣裳

無題三首

悄悄風色寒白地不敢看天尾是故國天頭是  
長安

嘆息復嘆息淚沾頭上巾青萍將底用光掩屬

車塵

明月豈長好的的入我懷東風不愛情浮雲與  
意垂

漁者

白日下廣川煙濤去不還平生釣魚意入手便  
忘筌

虹橋

虹橋不可渡東斷蓬山陽只有賓雲曲流音下  
大荒

韶州吟二首

聞渡韶陽水滄溟水更深姬媯時入饌莫作百  
蠻音

蠻溪楓葉下蠻女答歌還太平無外患何事百  
牢關

閉門四首

閉門打垂坐鵲噪庭下槐種竹成琅玕天風颯  
然來

曉起披雲氣攤書青澗阿六經無一字祗道配

江河

讀易苦解事閱世涕橫臆如何中天日未見羣  
陰息

葺彼南陽廬瀟灑玩世事平生梁甫篇吟對滄  
浪水

畫六絕

皎皎水上仙風吹入我懷我夢逢姹女洛波墮  
弓鞋

胡人競北風牧馬陰山陽腰間寶刀赤河清爾

來王

頭陀戲海蟾手握庵摩果大觀天地間一咲吾  
喪我

鸚鵡乘天巧幽篁學語繁江南氣侯正莫過魯  
東門

賣藥行市南隱身入壺中指揮費長房白日騎  
黃龍

六拍按六氣廣樂音未希舉手謝世人行歌綠  
雲歸

病中吟六絕

掩書臥玄冥蟋蟀在床頭如何閉關月耳畔鳴不休

形骸久爲累三尸今晏然安得魯仲尼展轉鑄顏淵

虞卿爲著書卒歲坐窮愁那知文字外翻有逍遙遊

有身終是盡學死始長生吾將鍊真性去去凌紫清

愛河易漂溺三山波浪翻覓心了無得吾今閉吾關

詩書破我拙聰明多事起那復黜聰明返我混沌子

伏嘆五首

少年逐鉛槧學道苦不早眼看春田花誰是長久好

密雲不成霖西郊氣烘烘女其蛟與龍胡爲處池中



窮年守庚申服食意未已如何三尸蟲猶在腹  
心裏

生亦何所喜死亦何所悲言脫生死關短脩復  
誰尸

中歲聞大道鍊已成蹉跎去日一以多來日今  
若何

六言絕句

洞霄

白髮久辭華表青牛已度函關五內天花未飽

麻鞋踏盡名山

七言絕句

題邵二泉繡嶺草堂二首

湘山寂寂楚猿啼湘水迢迢過客悲何處篋管  
不愁思邵公惠麓武公淇

茶仙品泉泉爲寒泉翁愛泉泉出山只欲逃名  
逃不得許多甘冽在人間

登北固樓

北固樓前鷺鶴風奔濤蹴汝撼龍宮舟楫是非

京口渡關河憂患海陵烽

遊焦山

焦丘龍臥浪冥冥瓜步雲回海樹青風塵重問  
焦光洞讀罷華陽瘞鶴銘

武夷曲次晦翁棹歌十首

幔亭彩幄會仙靈紫霧濛濛薄太清奏罷人間  
可哀曲鳳笙龍管杳無聲

棠爲楫桂爲船紫嶂丹崖錦映川我是開元  
李居士鐵龍吹散萬峰煙

不道巫陽十二峰玉環珠珮淨雲容美人婉婉  
秋波立迥隔天關百二重

藏裏黃棺壑上船春風秋雨自年年覺來天地  
終歸盡煉得丹成亦可憐

蛻骨藏真傳此巖土花石黛已醜穉那能縣綆  
探金樽下擣龍宮萬仞潭

大隱屏前煙水深九霄雲覆紫芝林形埒不作  
含香夢丹洞忻傳出世心

水過蒼屏灣對灣山形密似百牢關巨鼇不戴

東溟去要與乾坤作大閑  
博羅東下三百灘噴雪奔雷仰面看虬龍不出  
蝮蛇出天風下來吹歲寒  
石鼓雲樓天漢開飛泉幾道白龍洄探元笑入  
桃源路黃葉千巖風雨來  
九溪歷盡興翛然亂瀑喧厯赴錦川尋源已到  
明河曲飛鳥還過一字天

金陵

紫禁金門閉寂寥不聞清樂下丹霄  
高皇事業如天地過客何須話六朝

臥

黃帽青鞋何處尋道人高臥南山陰閒誦維摩  
一百偈白雪牀前三尺深

竹枝詞二首

西澗西邊東澗東千山不斷萬山通謝豹見春  
啼出血王孫上樹捷如風

梨嶺遙於楓嶺遙小關高比大關高傭夫過嶺  
如平地一歲來迴一百遭

送林仲穎赴馬平

東浮淮海三千丈南過羅浮四百峰知爾欲尋  
勾漏令會看雞犬白雲中

送陳侍御使廣

嶺南巨海散溟濛海上羅浮四百峰炎瘴直須  
三尺雪鱷魚先避五花驄

權歌四首

鴻鴈飛來風雪心鴻鴈飛去天山陰二月大山  
風雪淺六月天山風雪深

鴻鴈飛去稻梁荒白鷗不飛毛羽傷天寒日暮  
黃蘆蕩江水渺茫心渺茫

送君把君綠荷衣悲莫悲兮生別離衢陽向上  
江水絕縱有鯉魚何處來

青螺江頭遊子吟黃金臺上秋水深風塵一別  
一萬里美人駕車傷我心

南征二首

去年出師大冒山五千步騎凱歌還可憐今日  
山前月又照漳南諸將壇

贛水西邊是賊壕年年楚越泣弓刀天戈指處  
欃槍落來歲徐看破爾曹

望靈山

上饒縣北香爐西暮靄朝煙咫尺迷平望靈山  
一百里高南峯影入沙溪

天姥行

天姥旁通天一門下臨絕壑桃花源玉珮靈車  
杳然去鳳笙吹斷越山竟

赤城懷太白山人

天台歲月輕劉阮不見雲端雙玉簫知爾西湖  
臥風雪神遊先到石梁橋

昔余夢遊鴈宕乘最高臺東觀海波浩蕩  
回望萬峯蔚蔚雲際及登盤山歷歷如在  
夢中竦然題句

昔年夢上百尋臺薄海鯨波天地迴四十九盤  
東向立鴈山猶是夢中來

羽獵謠三首

君王自擁鸛鶴裘獵騎翩翩盡貴遊歸來錫宴

傳封拜狗監雞坊十二侯  
羽林十萬是親軍漁陽鐵騎天下聞廐馬長留  
太白壘胡天驚散犬羊羣  
今年天子又行邊勅報旄頭照酒泉乘輿自領  
驃姚部內使宜頒九府錢

送人遊吳興二首

黃龍洞下雲色深  
雲水苕溪吏隱心  
東道若逢孫處士  
青春須寄峴山吟  
鳩茲城邊望不稀  
翠木朱藤罨畫溪  
津吏揚舲倡歌去  
溪花十里使人迷

天姥吟

山人住在天姥陰  
憶余曾登天姥岑  
雲樓雪磴參差起  
下控桃源幾許深

燕京三首

將軍白馬紫金韉  
接鞚聯綏綏御座前  
並誇異姓稱皇孽  
不用長纓係奠韃  
緋衣紫甲入東華  
羯鼓饒歌散御花  
邊士盡騎天廐馬  
燕姬翻泣五雲車

山後諸胡寇朔州 君王按劍到邊頭二月凱  
歌班士馬天閑遺却萬驂騑

逐客二首送劉伯儒侍御

黃衫白馬簇金臺逐客飄飄去不回莫向猿聲  
墮清淚銅環椎髻解憐才

尉陀城外汎雲槎西望峨眉隔水華若道日南  
天萬里歸心一夜過三巴

山人

稅鶴停鸞去不分玉簫瑤瑟散春雲日暮天花  
吹建水曾孫重拜武夷君

新製白氎巾贈崑崙山人二首

細葛新裁白氎巾風塵把贈武陵人漁樵早晚  
相攜去五色瑤花好自紉

萬里黃河天漢通崑崙遙帶碧琳宮青牛已度  
流沙去迹作虛傳河上公

曹仲禮索巾云將歸具茨兼柬王稚欽

元是山人白接羅雲遶贈女莫相疑便從夢澤  
穿嵩少更歷襄城問具茨

送林茂貞大理二首

君今執法白門西  
余亦將隨倦鳥棲  
黃籜爲冠  
芟爲服幾時停棹  
武夷溪

武夷溪上水濺濺  
東入滄溟天漢連  
萬里裹糧  
從汝去乘槎直到  
女牛邊

正德十四年四首

君王按劍東南征  
錦障黃旗出鳳城  
矯矯六飛  
熊虎士中原萬里  
倚戈行

雲中鐵騎獵漁陽  
鼙鼓填填夜未央  
白馬將軍  
傳號令金盤寶篋  
進壺漿

黃牌使者出行營  
選舞徵歌傾衛城  
報道儒生  
飭士馬南州叛賊  
一時平

桑黃渺渺躡飛塵  
清路人傳天子真  
宰相無  
須保車駕至尊雄  
武動如神

送人之鬱林二首

蒼梧之峰雲萬盤  
下控牂牁連百蠻  
莫道蠻方  
非近地日南南是  
漢關山

鬱林東下對扶桑  
黑霧沉山日暈黃  
鷓鴣啼上



桄榔樹一寸鄉心萬里長

蜀中歌五首

巴東春水錦江來流入荆吳萬里迴樓船細逐  
江花去不見瞿塘灩澦堆

峽猿啼過下牢關雪嶺連天三百盤錦官城外  
西遊客白日高歌行路難

連雲不斷三危路雄路猶殘八陣圖巫峽劍門  
天地險錦官白帝霸王都

灤東灤西花映渠浣花草堂今有無苦憶平生  
杜陵老暮年涕淚滿江湖

文園尚憶馬相如錦水風雲逐駟車若道君王  
慕封禪西京元有茂陵書

送人之嶺南二首

蠻江春色接瑤京江岸桃花流水聲他日雙鳧  
來謁帝蓬萊宮畔笑相迎

潮州東門鱷徙溪行路蕭蕭猿狖啼可耐曩時  
勾漏令雲車更度鬱林西

巴人曲

峨眉山色上青霄白帝祠西巴路遙二月巴江  
花爛熳一聲羌笛爲停橈

寄安公石黃門二首

聞君久住成都市豈爲成都賣卜錢萬里橋西  
逢蜀使問余何事女牛邊

草玄亭下浣花溪載酒看花隨杖藜青春不斷  
黃牛峽日日思君猿狖啼

送人下第歸蜀

黃金臺上草已蕪錦官城西花映渠知君賣卜  
成都去不羨風雲叩馬車

南望湖二首

南望諸湖波映空揚舲東逐芰荷風垂楊亂覆  
茅簷綠好着魚梁山照中

湖上空波明綵霞逢逢花鼓若爲搗雲帆擬挾  
飛仙去滄海驚傳銀漢槎

黃河二首

五月黃河風不迴六鼇東湧雪山來烏檣天轉  
蛟龍窟未道瞿塘灩澦堆

桃源縣前雷雨急  
洪河拍天黃霧深  
淮南古意正  
愁目更着夷歌亂客心

瑯州歌五章

青氈烏帽適天涯  
白首投荒莫咄嗟  
東徬扶桑多薏苡  
南過勾漏有丹砂

長鯨一湧雪山翻  
海若爰居不可馴  
知君定怕風濤急  
白地風濤怕殺人

君家住近海門潮  
君去朱厓不寂寥  
悄悄罔兩能人語  
種種烏蠻解漢謠

蠻子灘頭興不孤  
桄榔樹下打娵姑  
年年五月荔枝熟  
翻怪先生愛索居

嶺表黎酋分鳥羣  
桂林象郡總能文  
更憐蜃氣朝朝見  
莫厭猿聲夜夜聞

夢黃山梅花

陽湖春動蕊珠宮  
我夢黃山白鶴峰  
羅浮仙子娟娟下  
笑整雲裳風雪中

同王方湖泛舟鑑湖入蘭亭偶成贈章二

首

木落秦山近草堂避人仍葺薜蘿牆知爾經綸  
數在手釣船長繫鑑湖傍

鑑湖放船雲霧光蘭亭八月溪水長我愛風流  
王逸少青山同引碧霞觴

若耶溪

山迴水曲若耶溪八月荷花光映堤越女勞歌  
採蓮曲江南今有杜鵑啼

剡溪

曹娥江接剡溪流亂石幽花只漫愁剡曲尚疑

安道宅山陰誰上子猷舟

東山柬董文玉諭德

東山中峰天漢連紫筇丹屐共雲煙高臥正懷  
謝太傅莫令小草後人傳

清風嶺

嶠浦橋東雲壓山清風嶺矗明河灣捫崖忽漫  
雙流淚日短風塵易滿關

天姥峰

天姥峻嶒不可招雲巖雪壑傍丹青天台四萬

八千丈俯看飛虹度石橋

答天彝

君今笑入天台山余亦欲田箕穎間白日風傳  
紫芝曲莫教人識是商顏

看花

山藤花開紅映衣看山藉草遲遲歸錦石無人  
溪水下隔花刺船鷓鴣飛

天台雜詩四首

一夜雨聲吹不斷國清寺

欲過天台

拾瑤草秋風無限石梁情

赤城雲閉玉真符桐栢宮涵滄海珠早晚移家  
葛洪井瑤臺雙闕是仙都

華頂數峰飛刺天長風白日灑雲煙鹿裘行探  
金明草笑拍洪崖星漢邊

曇花亭前雷雨飛石梁天巧眼中稀素裾綦履  
沾雲濕我自天台華頂歸

江村

錢塘江浪拍天來江上茅堂負郭開蜃樓鼉鼓

時能見鷓鴣鷓鴣晚自迴

青塾堂成二首

飄風落木氣蕭蕭抱病經時亦自聊湖上小堂  
馴燕雀年來淨業混漁樵

子真谷口成深隱少谷柴門故自開藥裹書籤  
蒙不理海鷗江鶴日相迴

遊淘江贈林樗翁

野亭雜花紅近人山翁愛客青綸巾涉江欲採  
芙蓉去無數秋風髣髴髮新

戲作木虛據石圖

雲裏孤峰爾獨憑下觀星斗帶滄溟翻身笑折  
三花樹擬傍蓬萊頂上行

送克相侍御使齊魯五首

千盤代山嶽矗琳宮萬壑平吹瀚海風何能一採  
金鵝菜並爾呼雲日觀峰

淄青南下滄溟開鵬擊鯨翻天漢迴東巡定上  
蓬萊閣五色樓臺萬寶堆

吾憐白浦控滄洲日盡雲槎天際流儻遇阜鄉

雙玉鳥與君高結望洋樓

海內談詩王秉衡春風坐遍魯諸生我昔傳聞

薛吏部爲君遙式洛陽城

檣李忻逢孟望之湖邊秋艇把楊枝青袍笑入

襄陽社白壁翻傳梁甫詞

送人之萊蕪

萊蕪縣在海東頭遷轉還君山水州日日鳴琴  
了公事魚龍波浪眼中遊

贈武夷道士二首

幔亭道士住紫宮年過八十氣吐虹揖余解下  
雙龍劍指點雲涯三百峰

武夷亂峰攢紫蓮丹房想在彩雲邊分君一粟  
庖羲洞閒弄明河抱月眠

漫興

忽驚溪虎連羣嘯不分林鷓朝暮啼畫省行臺  
堪牧馬山城更鼓不隨雞

觀馬清癡所臨元繆佚山涇雜樹詩画戲

爲題句

吳下風流盡此物後來好事更傳真爾輩安身  
是何處素毫零落寄丰神

塗山

泮水東行滄海迴衣冠玉帛萬方來後期獨有  
防風氏君看塗山戮將臺

禹穴

脫屣行探禹穴靈萬年鴻寶秘丹扃梅梁空石  
空山裏想見虞廷舊典刑

曹娥廟

東關東偏曹娥碑今古流傳絕妙詞洪濤駭浪  
翻滄海要識人間孝女祠

桃源

桃源紅映赤城霞洞口春開度索花擬傍東方  
啖桃實不隨劉阮問胡麻

石梁寄會稽王山人

石梁跨海與天通千里騎驢識孟公東路寄書  
王子晉遲爾緱山緱氏峰

委羽



東海龜茲仙聖居琅玕芝草洞天虛函關已斷  
青牛駕委羽忻逢白鹿車

有背師者索題東臯書屋

東臯書屋傍風雲翠篠紅蕖臥典墳請君終學  
壺丘子沂水鯢桓恐未聞

至日

玄冥久不行冬令瘴霧蠻烟泥殺人惡草翻翻  
長至日未看蘭蕙轉陽春

次素翁臨滄亭

滄海鯨波天漢長壺公東影拂扶桑彤雲彩霧  
行空壁此是人間素老鄉

灘上

雪噴雷轟三百灘臨川力擬障迴瀾湖奔險過  
瞿塘峽細看中流砥柱湍

吳門送黃明甫僉事赴嶺南二首

吳門海風吹白波歲晏離城可奈何明到羅浮  
避冰雪還君及早播陽和

其二

江頭日暮歌欲罷  
告訴不盡哀情多  
嶺南自古炎蒸地  
君去風霜合若何

惠山吟

去年曾飲中冷水  
今日初嘗第二泉  
我有靈泉甘比蜜  
無名應是在山偏

延陵送劉克柔

延陵四月新水生  
延陵江上送君行  
行過長淮莫停耳  
淮南淮北鷓鴣聲

玉山二絕

懷玉山前黃葉深  
遠天烽火上人心  
不知何處歌都護  
拍斷尊前梁父吟

十月玉山寒雨生  
萬峰疊疊更分明  
長溪淺澹從容滿  
冷蕊枯萸次第榮

画者

近愛錢塘孫画師  
江山花木亂生姿  
正愁京洛風塵急  
却耐龐眉歌紫芝

赤城

天台山前黃鵠飛  
仙人城闕赤霞圍  
最憐謝女

蓬萊去未識人間馬子微

送沈一歸閩

烏石山傍思蕨薇還家頭白故人稀  
溟溟苦海沙棠棹幾處風波他是非

瓠子河遇葉六

草草逢君瓠子河河水瀼瀼柰君何  
雲山涕淚渭城曲天地爭迴易水歌

歌風臺

陸賈詩書叔孫禮猶能潤色漢乾坤  
爾曹未是真王佐威鳳文鷁未得馴

大風之計在四方豈意牝晨禍蕭牆  
身後貔虎盡食邑左袒危乎仗彼蒼

寄黃明甫僉憲

頗憶故人黃小江爲官三載帛書荒  
閩州幽事笑殺汝麥飯藜羹薜荔裳

檳榔不過南詔驛五嶺冰霜今已多  
歲晏詩篇尚記不吳門海風生白波

宿石門晦翁讀書處

石門抱被雲濕衣流水聒耳無是非海潮夜語  
梅花戍起看扶桑朝日輝

籌峰南下楓林西岩閣千盤平翠微雲蹤不見  
朱夫子尸祝能談劉布衣

### 悟道松

玉柱峰頭悟道松根株歲久化爲龍若比茅山  
左紐檜大千世界極鴻濛

### 遊丹青閣讀舊還懷許黃門啓衷

風流不見許黃門文字丹青閣尚存最憐佳句  
車盤驛黃犢青山何處村

### 太山三絕

巨靈盤盤闔闔門日觀峰頭玉冊存黃峴西行  
看落日碧霞南面拜元君

秦皇自謂功無量擬揭空碑古帝前磨崖小篆  
三千字何似開元十四年

苦憶太山孫處士春秋三傳尚須編只今四海  
無青眼欲向何門乞俸錢

### 讀漢書四絕

鄧禹數言天下計定功端合首雲臺牛鼎終非  
真會合中興不復食鹽梅

子陵不廢桐江釣才力還堪比傳岩漢室規模  
故人意只餘糠粃落空談

不及遼東管幼安龍翔鳳舉出人間東京竊笑  
三君輩風節何裨末路難

建武閉關示無外後來夸者却開邊虎頭何物  
飛食肉西山康居三十年

### 河道

金陵方物上樓船州縣流傳則例錢聖主戎衣  
無盜賊山東河道避冰鮮

### 龍湫

龍湫瀑流轉怒雷回風散作靈霧飛青旻倒掛  
鴻濛練斷盡天孫雲錦機

### 沿溪見白蘋盛開

江深木落見蘋花千澗秋容爾自佳不隨穠李  
分春事要接寒梅成歲華

### 天台

崩湍轉瀑下龍湫晶晶銀河綵霧浮履險能無  
伯昏分等間來往石梁橋

讀松江漁翁傳

垂釣松江三十年澡身浴德意仙仙那能心跡  
俱忘後共女中流歌扣舷

呂徽之

平生意氣呂夫子遁迹空山薇蕨春不分羯胡  
主中國獨操魚釣寓經綸

元天台戍婦不知其姓名有殊色千戶長  
欲奪之不可盜械其夫陣亡時守囚者頌  
其係且恤之至意在婦也久且左其夫令  
聞之婦婦曰君以妾故至此妾顧可負君  
耶遂棄兒女自投于百步石厓下柴立湍  
激中死數日不仆當路聞者爲釋其夫囚  
仍立石旌其烈石在紫陽神化之處今杳  
然藁葬也余過天台訪而吊之

台山名姝人共悲殺身千古怨娥眉不道激湍  
無獨立桁楊夫婿已全歸

贈族人栗齋侍御

露公之後世多賢侍御才名英妙年總見風霜  
上容色更期搏擊向秋天

青野堂成二首

補

小隱堂開青埜上鵲鴝鷓鷯傍人初安身正學  
周夫子庭草芊芊費剪除  
不厭芳華耽寂寞江湖廊廟本同機明時正好  
興周道要識莘磻是汝師

班玉杖歌二首贈木虛

阿羅掌上千年物信是蓬山綠玉杖拄到中天  
斡元氣乾旋坤轉莫知誰  
君家拄杖班龍質十二星精光恠多直教騰踏  
風雲去王道平平奈爾何

至日

補

滄江病裏逢南至化國欣看日線長未堪取醉  
酬佳節恐碍垂貂夢紫皇

江南氣候異京師天道流行動失時柳條梅蕊  
相催迸蛺蝶黃鸝未入枝

贈樗翁

補

樗老釣磯淘水曲漁竿獨抱弄滄波經綸老手  
終自惜鼉掣鯨翻奈爾何

送平厓侍御使山東

補

爾往乘驄山海東赤霞心捧大明宮腰間繡斧  
橫金杓白日青天意氣雄

鰲峰烏石殘芳迹天府雲臺祗薄遊堯舜山林  
余且隱伊周事業女須謀

孔林東奠龜蒙山闕里長存天地間要得吾儒  
振羽翼迷方回首聖賢關

八神長呵封禪文魚鳥能符七十君誰令先帝  
終巡幸御帳親團龍虎軍

殷浩墳前烏夜啼飲牛那復魯門西我愧延陵  
吳季子將無佩劍慰冥栖

金陵咏

補

金陵佳氣鬱崔嵬鍾阜龍蟠陰殿開萬里山河  
陵闕脈千年松柏棟梁材

皇皇嗣聖造乾坤靖難勛臣有特恩王魏多知



權所重夷齊解事喪其元

靖難相傳是佛緣浮屠九級荅諸天琉璃力盡  
金銀帑黎庶身塗十八年

閩粵猶傳湯大夫殘山振海定皇輿當年別後  
懸金印今日人間賣玉魚

鄱陽戰罷錄功臣赳赳中山第一人  
不識漢家同用武雲臺顛倒序元勛

祀典春秋享帝王漢高俎豆有輝光  
皇王帝伯原功德戰伐何如揖讓長

南征補

貔貅南出晉安門劔戟如霜萬馬奔  
小醜應湏就殄滅天威南面正乾坤

君王南顧似深憂每遣材官守贛州  
多士能無見節義諸公何意遁巢繇

將軍自許霍嫖姚豺虎山南尚爾驕  
有人伊昔持干羽不出階除格有苗

官軍不出粵山深招撫年年空費心  
天子拊髀思葛亮南中孟獲定成擒

縱使孫吳親戰陣何如仇覽在蒲亭鳴梟亦化  
爲鸞鳳農器寧銷作甲兵  
贛州城頭鼓角哀清漳道上羽書來何處總戎  
深屬望陽明夫子出羣材  
旌旗赤赤巨紅雲鉦鼓逢逢警六軍壯士不圖  
收戰骨五陵豪貴策奇勛

鄭少谷先生集卷之八

終

鄭少谷先生全集卷九

閩中鄭善夫繼之著

後學鄭奎光章甫訂

序文

修江先賢錄序

史以考信古者有國有史古史莫信於春秋春  
秋魯史也聖人之文約而苞其義大而公自秦  
人黜封建則史氏用獨獨則遺於是乎有紀錄  
之書或以時或以地胥如志也自秦而下凡百

餘家大率有四病不避則溢不濫則漏名蕩乎  
實之謂溢有所怯之謂避信輕之謂濫識踈而  
聞寡之謂漏四者于其人焉不鑒於春秋之義  
也雖然顧補史氏之遺耳余序修江先賢錄知  
周子之善用春秋也賢寧產也寧春秋艾子之  
國也錄賢而係之修江者其漢脩江錄山川之  
能也始於漢者封建旣黜之後也建置沿革乃  
始於三代之先者假一邑之文統元也統有五  
號曰正曰閏曰僞曰賊曰蠻夷或正名以統實  
或去實以全名用宋庠之意而折其衷也賢有  
六科曰忠孝曰事業曰文章曰特行曰貞節曰  
仙釋集有五義曰正曰續曰附曰別曰外正者  
上也續者嗣也嗣似也附者依人以傳也猶附  
庸之依於大國也別者別也別閏闡之範也外  
者以道其道而外之也曰公曰先生者鄉先生  
有尊之之文也錄而必按其履者不枉其是非  
之實也凡是者皆用乎春秋者也錄實則不溢  
號明則不避科分則不濫義該則不漏是錄也

但補史氏之遺耶稱信史矣

醫林集要序

余嘗讀內經不盡通曉然頗會其意自古成毀相因陰陽散伏民鮮戩穀於是乎有草木金石之英以衛之而憲之於經是故犀羚蠶蠟貫衆茵陳豨苓狗脊酸辣苦鹹神奇臭腐齧口齟齒蜚吻裂鼻而各有投人之經而裨其生焉者及其傳之既久人不解究竟任疑用獨而經乃樊亂至仲景李杲始肆爲論說發其疑義而經復

一明然方士異宜古今殊運兼以庸醫固滯顧懵然莫適其所從耳成化間有王氏壘者迺復苞并百氏之異同沿時適士偁長置短約爲大常而不畔于經於是乎陰陽相勝之機氣運旋斡之變胗切攻熨之法宜補和平之方木石洩液之分輕重沉浮之數翕然遂大定名曰醫林集要凡若干卷鄱陽胡公購而梓之以公於人其惠博矣始予病肺羣其醫而藥之至彌歲月弗療豈真方之不足以愈病耶是書之行有

仁之惠也人有言曰不爲名相卽爲名醫其作用巨小功惠舒疾雖若弗倫而仁之流一也人亦有言曰弗善爲醫莫善爲相有所操者有所縱也公名韶時爲閩大方伯云

### 草木子序

草木子葉子奇氏栝人博物洽聞達於古今生元季詭時匿德於龍泉之槎溪立言以昭厥志人亡識者所著有範通玄理太玄本旨各二卷詩十有六卷文二十卷本草醫書節要各十卷齊東野語三卷草木子二卷草木子成於洪武戊午狴犴中稽上下之儀星纏之軌陰陽五行生尅之運海嶽浸瀆夷戎希乏之物神鬼伸屈之理草之變魚蟲之尤律曆推步易衍之大宗釋老禮制之書而之於六籍之緒大歸同焉野語記時事失得荒兵菑異而文弗避而義則則乎春秋古稱虞卿非窮愁不能著書草木子其善窮哉草木子云者草計時木計歲以况其生而傷乎其言之立也或曰草木子劉基宋濂時

人詳觀誠意集未之及者而濂敘太玄本旨似  
不心贊其能夫二子者亦蔽賢乎哉凡人賤近  
而貴遠知者相世機則掩其識昔揚雄譏太玄  
法言與州箴以比迹聖人當時雖劉歆輩號稱  
知已亦拙其書顧乃盛傳於後世好奇者以爲  
奧於孟軻然玄實失之滯法言州箴亦多迂謬  
今觀草木子其義至精論甚正使遇賢知者聞  
而張之走揚子矣其與法言太玄並傳復何嫌  
耶而或者又以惟鯨胎生無無華之實胎卵濕  
化貴賤之類病之是惡足以累其成哉舊本凡  
二十八篇今纂爲四野語凡三卷今爲二其七  
代宗子溥殺青而行之并曰草木子古語云傳  
先之美仁也刻成晉安鄭善夫爲序正德丙子  
夏日

重脩南湖鄭氏族譜序

舊譜依歐陽法系圖以五世一提竊以人身各  
具五世五世一提則高玄捍格昆弟失倫且子  
前父名孫前祖名義不可爲訓今酌蘇法以父

子爲世父上稱行明昆弟也稱爵稱公稱號若  
謚子下稱名明父子也帙必實錄示信也傳贊  
銘志備本支詳所親也於賢者雖踈亦備賢賢  
也爲僧道不系女出而失節不系絕之也出婦  
與失節不系旣絕於其夫也系於子之下明天  
下無無母之子也女而貞與婦而烈傳志附其  
父婦節與賢附其夫勸也帙附祠堂儀節附祭  
田附家法家約禮之備也鄭出唐別駕蕭南湖  
淑公派閩中丞元弼公後傳八世至源深公徙  
三山今其墩亦曰南湖不忘厥自也祠始源深  
公重始遷也以四世祖天祐公配以功德推而  
立之也有祔祠以無胤者祔食恤無胤也善夫  
比到莆得通元弼公以上譜到仙邑得八虎以  
下派因拜祠墓合族人今增而詳之居三山南  
湖十世孫善夫謹誌

僉事顧箬溪平寇序

古稱蠻夷悍輕易怨以變控御失所則負岩峒  
相嘯呼如蜂屯螳雜不可爬而梳之風氣之以

也甌閩古百粵地也潮漳之隩枕海其陰多大  
山山連亘深阻小口中漫上廣下銳蜿蟺數十  
里蔦道莽如行不可駢肩世惟蠻夷所據而獷  
獠亡命之徒往往竄而附焉爲孽梗州郡兵至  
則憑要害下矢石狐伺鼠伏以逸敝我之騷騷  
急則移山蹈海視嶽崎滉瀆若平地然數年歷  
文武圖議攻撫並用然力用頓而患且益滋蓋  
攻而無法則我去而彼來撫而無信則朝聽而  
夕叛 朝廷大有憂焉乃命三省之師悉草薶

而禽獮之由是而僉事顧君以簡行十月之吉  
視師於潮君至潮號令惟嚴鞞鞞惟明裨貳惟  
良甲卒惟馭閱惟時動惟機正月誓師進次于  
饒平由是而撥箭灌蹙大滙擣木塞趾泥園而  
夷之殲渠魁二十俘其鄙盡自潮之南蓋先漳  
顛之聲而禡之氣者昔之善師者果而勿矜果  
而不得已行無行攘無臂仍無敵執無兵以制  
勝也君淞西書生也一旦仗鉞卽戎以當悍輕  
巨寇卽能決全勝於幾之先以關介冑之口語



曰章縫之流不可語金革豈盡然哉君知足以集事果足以有功恤足以輯民文足以經世此一事也舉其全不有却走馬以糞乎潮郡丞林侯序君之績欲吾黨張之次年爲正德丁丑秋七月日晉安鄭善夫爲之序

### 太白山人漫藁序

太白山人漫藁者吾友孫一元太初所爲詩也夫曰漫者觸而成聲無謂有謂之云也太初關西豪杰也束髮入太白山爲山人繼入終南汎觀恒岱遵龜蒙慕宣聖遺韻止于鄒魯之郊久之踰江淮下吳越鵲冠布袍獨立於萬象之表志才如也夫高蹤遠影者顧以世爲不足爲乎及讀其詩皆悲壯奇崛感激奮發而卒澤以冲和如神龍在淵變化不測得時而興乘雲雷以雨天下噫是豈忘情遁性爲犁輿來祀者倫乎或曰太初離親戚去墳墓遠遊于方之外與名教或不相蒙者是何言哉孔子曰丘也東西南北人也復欲居九夷莊子陵去齊適越管幼安

徙於遼東孫明復隱居于太山之陽邵康節去  
家入洛四十而後娶古之賢達流寓於外要必  
有所爲而安焉者獨太初爾耶或曰吳越之人  
右文人易致名譽太初操觚飾智揭揭然爲高  
意有終南之捷者夫以太初之才稍自抑以應  
今之世何往弗達顧甘心寂寥卒其世以飶無  
端功名耶吾嘗與太初乘月汎洞庭浩歌漁父  
傲睨一世似無少芥蒂於其懷又嘗與臥西湖  
之上見其息深深時乎天壤時乎地文要固有  
道者吾聞無欲而後可應世今之應世者可勝  
議哉漫藁凡若干余爲之序以傳藁而曰漫則  
固傳也太初不與也

### 子通序

子通一書余臥罪長安時口授林壁者每講一  
通命壁錄一通居兩月壁去講錄止述而篇嗣  
是無從講者遂不嗣錄是書出一時應接殊有  
語病噓辭安能盡余意耶雖然實余獨得之心  
而應之口者也雖然今之事舉子者用不行也

故璧亦叛去於戲此學晦久矣舊習之膠人也  
固矣余安望世之余知也雖然不作溝中之斷  
千載之下會有知者余竢乎千載之下嘉靖元  
年春三月念四日求志齋夜坐偶閱而志之曰  
子者四子也曰通者通理也

送王子北征序

雙林王子將北征十月初吉觴王子於新亭之  
上王子曰諸君子其亡命余耶鄭子晉曰子今  
可以踉足而前矣日余夢羣羊而角子其先者  
夢而診其夢曰羊祥也羊而角解之文也子將  
先羣祥而起與又兌爲羊兌正秋也子之起也  
其於秋與今余夢而信也前是癸酉之歲余夢  
其伯子余夢而信也亦無異於王子何王氏子  
數數余夢寐間邪昔商宗夢說按夢而得說得  
一說遂嘉靖乎殷邦方今天子秩德商宗蓋夢  
寐似說者將物色而賓之以嘉靖其天下王氏  
伯仲其人與王子工若天而佞若人吾見其注  
焉溲焉積之詔矣聞之越矣時日及矣余春曹

賓人之舊也今雖矇矓向曾與於麗綺之觀矣  
無將兆魄於余行且感於天子之媾者乎子今  
塗游于四樊吳越淮徐其歷也梁楚在西燕趙  
在北目將熒之耳將傾之當武皇之世天疆其  
毒百昌悁悁凡辛酸苦鹵靡不有也調之鼎俎  
以奉于天子在此行乎王子興曰嘻未牧而牂  
在與未弋而鶉在突吾且疾鶉牂之狃吾遽說  
之能當余曰古語有之遊心上行人定其亨伏  
志無極天贊其吉且也二三子之與子友也相  
券以內也相助以消也下是曷以命子二三子  
揚觶而前曰君不見吹劍首乎下是則一呖而  
已矣鄭子之夢子也非信也其命子也信也於  
是王子載余言焉遂北征

前丘生行已外篇序

前丘生余友傅子也行已外篇歲爲卷歲之乙  
亥與余交余贊之錄其所爲詩篇始乙亥始交  
余也前丘生詩淵致瀟散多發之性情其道江  
湖林壑神仙隱逸直臻其要妙蓋本風塵表人

也平生志不專詞章然其爲詩實上下魏晉抗聲於武德天寶之間大曆而還不論也余誠愛之慕之其不能使余忘情者是篇耶前丘生日所切嗟者悉見之外篇自余外皆豪杰士也豪杰之士無文王猶興詎分以辭章自坎乎詩三百曰思無邪吾夫子之言也前丘生進于是矣其發之性情故曰行已其見之文字故曰外篇云

送夏方伯赴浙江序

明有天下置十三省省統以左右布政使卽古之方伯也有地數千里省之僚采與郡州縣之長凡所謀議伯主之天子之政令教化伯宣之天下之財賦與百供具出之民者伯處之伯之任實重且專也非望弗遷非能弗釐非德弗鎮非若他官之徒以釐以鎮者吾又以見伯之難也夏公某爲吾閩廉吏風裁肅清未幾天子使之伯於浙非以其德且能乎哉夫浙隸府十一壤地三千里其僚采官屬財賦當天下一

之一 天子政令之行必以先之又非若他省  
比公何以爲之吾聞公向以御史巡斯土莊嚴  
練達於今爲烈所以理吾閩者是道也况旣理  
之地有不易於理者乎天下論諸藩垣以浙爲  
首吾見他日論諸藩守臣必首公矣

蕭司訓還永豐序

蕭子佩校閩邑三年不樂於心一旦集諸子言  
曰吾寧役而形而復紛而志吾不當時命者也  
吾其歸諸子長揖而進曰先生業明而行成未  
世而遺行位乎得於校也夫何枯於修蕭子曰  
子欲我爲犧牛與欲我爲龜曳尾於塗中與吾  
智不子遇也母吾已秋且薄乃嗒嗒而歌曰陽  
之山兮龍龍景風濟兮山豐擷芳華兮盈掬聊  
容與兮山中又歌曰恩之水兮濺濺鴻之颺兮  
遠天原有桂兮隰有萼人率滑潛兮吾惡樂爲  
彼園念不移與議不及庭去之日琴一劍一圖  
書數數無長也鄭子善夫曰道不與世世不與  
道則至人之德隱時也深根寧極不得不聞此

之謂滑疑之耀故曰物不喪已俗不失性故不  
賊命得不殉名蕭子也符吾素矣

送魏負外序

正惠八年春二月大中丞彭公理蜀寇請餉於  
朝大司徒孫公議轉楚粟應蜀請疏以負外魏  
君行彭公以蜀寇故請孫公以楚粟故特魏君  
大若事也魏君之楚重若負也或曰制士在內  
三年得封其父母父母沒得享於墓魏君楚產  
也朝卒其事夕得致天子之命于其先行而  
忻於情勞而愜於私或曰大夫出不貳事公不  
窺家詩不云乎王事靡盬不遑將父閩鄭善夫  
執二議而觴之曰聖王敬義而厚情志士敏公  
而緩私君請權於斯二者雖然君子有必用之  
情有必恤之私比者刑臣煽孽九洛盜起齊梁  
楚蜀之墟殲於兵者十三叢於盜者十九朝  
廷募兵揀將括金需糧三年而中外爲虛寇不  
加少其故何哉有志者能無私於用情乎不也  
他日到軍門以告彭公歸以告孫公以復於

天子必有成筭者矣此則愚之所以皇皇致私情於魏君也已

送張巽所先生赴大寧序

甲戌之秋巽所先生行爲大寧博其徒鄭善夫議於泉山夫子曰巽所先生學博而通行介而不羣篤於文文尊六籍孔曾思孟之書敦頤頤顥熹載之格言至於耳周不害非佼鬼谷雄說潔寇安施齊丘百家之嗷嘈七十二子之著作一切屏而不序則其文也理然而三賓於禮部

一伏於青田青田地鄙而風漓漓則無介鄙則弗廣人習細故駭人之作新是猶張咸池於洞庭之野始於懼中於怠其卒也惑而愚矣今者大臣知之言之天子天子知之遷之大寧夫大寧武地也巽所儒官也行復何以處之夫子曰噫其信然與吾聞大寧左揖太行右控大都黃金之臺鬱乎嶷嶷卽燕昭王所禮郭隗致樂毅者下有易水其流湯湯卽燕子丹縞素壯荆卿之地至今其氣激烈而悲切其俗勁義而易感



我國家化成其人已相忘於文采非猶向之所  
謂鄙且漓者材成損益顧巽所何如耳邇者惡  
少哨聚殺人成丘高梁淮蔡播宕爲墟然則今  
日之教武未可畧也他日或有毅軻輩出其門  
而分禍變之憂乎抑有韓范輩出其門而鼓順  
平之盛乎是在巽所善夫以告巽所命書之以  
自益

### 壽圖序

介壽以圖非古也圖以物昭其祝也古之爲壽  
也以言今之爲壽也申之以圖是故有圖蘭桂  
圖滄海圖龜鶴松栢圖陵固也惟人子於壽其  
親也意蕩乎言言蕩乎物有恩勝者矣余表李  
錄甫壽其父菊坡先生作椿萱圖而於芝蘭松  
桂山海龜鶴蝙蝠麋鹿之類無不舉圖成率子  
若弟拜堂下而祝之如其圖者三凡遠邇戚屬  
畢至各觴酒爲壽如前祝酒訖命予以言尚其  
事余於菊坡與孺人有外戚之好有內子姓之  
分也言詎可少哉言之則情真情真則多而不

溢不溢則可書也於是乎書

繡嶺艸堂六咏序

少司徒二泉邵公以身養請於天子得歸錫讀書於惠山繡嶺之間編艸而堂時卽物而歌人見其適也君子於其歸見錫類之性焉於其歌而適見惕艱之情焉夫旣祿而身不違性之至者也旣逸而心不遺情之至者也至性者道之會至情者義之樞夫然後知純臣與純子也凡今之有君有親者可以興矣善夫爲公小吏繆受公知故旣序艸堂又賦六詩而使孺子歌之尚意也

劉氏祠堂八咏序

劉氏之昌於潮也自劉允始允之昌其氏也賢大得潮人官程鄉循化大得程鄉循化人世歆潮祀實祖劉氏祠始允之三世孫中允少集配以允二子龍圖學士昉光祿景禮也祠在城東湖韓山之後湖山麗而革宋元明祠完圯因之弘治間十世孫繼善用諸父瑄文理命廼協

昉景二宗胤新之治而墀堂設而宗祊序而遠  
邇釐執秩量典物百籩用光犧象昭明於時乃  
事於房烝擇柔嘉敬祓除水陸之菹之醢陰陽  
之物匪不時至於始祠爲侈焉猶曰不足以訓  
則掄美也於是乎有顯聞人八咏詩以裸其懿  
光教不忘也鄭善夫聞之曰君子之德遠矣吾  
於茲祠得人道焉復始也能備知美也能傳復  
始者義之章也備物者禮之周也知美者知之  
飾也能傳者愛之原也章義能祭周禮能敬飾  
之天道艾善必豐劉氏食艾也有豐矣夫

悠然亭序

嘗觀之世人遯世泉石者則有廢棄不平之况  
窮年宦海者則有舟楫失墮之恐二者窮達累  
之累則無適也閩義溪泉石僻野正遯世者所  
不遺陳堪氏作亭其際名曰悠然是將無廢棄  
不平之况者歟誠有堪者昔陶元亮不欲爲五  
斗折腰憐故園松菊飄然長往彼蓋不以窮達

累其真而得其生者故采菊而見南山適也堪  
無窮達之累者乎無累則無物無物則無我無  
我則無弗適矣是故萬色與目會萬聲與耳會  
萬氣與神會萬變與形會而心適也雖然人心  
不固久則移堪乎母厭山棲而思以舟楫駕長  
風則不免有失墮之恐爲我慎之

### 林下增恩序

林下增恩何以名紀榮也留餘陳公歸十年矣  
新天子推恩及高致之臣例進階爲朝列大夫  
尚故秩若曰有金紫之貴有上下大夫之別有  
不煩以官職之守有鄉邦之光榮也則不也吾  
於公爲鄉小子頗識公初公之歸義溪也鄉人  
駭之而嘖嘖相語曰是何歸之早也及朝廷以  
恬退風天下吾黨例公者不能二三鄉之人復  
嘖嘖相語曰某也與某也不與夫夜行不休者  
鮮有不辱其身也是則公所獨榮而人亦以榮  
公也迹公之故可以風矣可風可賦可賦可傳  
也是詩倡自公朝野大夫士咸倚而和焉艷其

榮也吾別有以發之且自勵云

壽蔡母詩序

蔡母生二十九年生浩四年而主亡苦心立浩垂二十年而浩達達十年克承母懽母心始無苦懽且無苦是之謂食天之和壽所因也君子曰達浩以艾母也天之與耳善夫未眷於浩詳母德於其六十也賦南山之篇凡十有六句云

葉古厓集序

古厓集爲文若干首今古詩若干卷其狂侃雖鏤滷矜燥濕錯然弗倫而悉和之以清揚藹如也余嘗辨其音節多放手唐宋之間惟吾言近體於杜爲似蓋亦奄奄然充其性焉耳杜詩渾涵淵澄千彙萬狀兼古今而有之他人不足彼乃有餘又善陳時事精深至千言不少衰世之學者劬情畢生往往只得其一肢半體杜亦難哉山谷最近而較少恩后山散文過山谷遠而氣力弗逮簡齋蠲而少春融宋詩人學杜無過三子者乃爾其他可論耶吾閩詩病在萎腰多

陳言陳言犯聲萎腴犯氣其去杜也猶臣地里  
至京師聲息最遠故學之比中國爲最難焉若  
非豪傑之士鮮不爲風氣所襲者况遂至杜哉  
國初如林鴻王偁王恭高廷禮輩邊然離羣出  
黨去杜且顧遠與古厓閩產也余讀古厓詩蓋  
所謂豪傑者竊嘗評其詩如春空游絮隨溫風  
飛颺衝條附葉雖乏穠綺然自有一段丰神猶  
至京師者越浙度淮駸駸乎北軌矣尚論風氣  
哉或曰如國初數子何如昔人云詩道如花論  
高品則色不如香論逼真則香不如色古厓葉  
姓名元玉清流人守潮爲古良吏其行履之詳  
見于長汀李貞夫氏歲彊圉赤奮若相月哉明  
撰

鄭少谷先生全集卷九

鄭少谷先生全集卷十

閩中鄭善夫繼之著

後學鄭奎光章甫訂

記

唐石墓田記

正德十一年春巡按監察御史胡公文靜肇置  
朱晦翁墓田于建陽崇正學也墓在縣西唐石  
大林谷九頓峯下先時考亭九世孫洵澍哀田  
若干與唐石居守者用釐歲事守者易代而困

田弗資且變歲事不偁又凡幾易代弗復也子  
朱氏道在人人之心有美弗復謂之右文邪語  
曰不肖者廢之賢者興之公至亟用惕然下令  
有司處田若干畝畀守者率時祀歲正輸公賦  
若干其令有司不得傭焉用是歲有積可亡困  
官可亡變積羸可備物用是祀無爽于時無弗  
備于器而凡坵垣圯桶無弗佗佗然葺也黍稷  
既登百邊既盈犧苴黷黷有禕有翼於戲子朱  
氏之道如是乎光哉凡祀有公田世不廢者惟

孔氏之徒與釋老爲然然釋老乃愚夫愚婦出  
以徼福有司傭之不少貸而賢者每斥而廢之  
且欲廬其居火其書而屏其道乃爾豈錄其孫  
子躋其有事貸其傭垂百代有崇而無殺如子  
朱氏者正邪之辨顧若是縣哉胡公政於閩首  
役念於其林墓君子曰見人心矣考亭十幾世  
孫烜一日走輿情於少谷請記其槩貞諸珉以  
無忘公崇正之休十一月初吉晉安鄭善夫記

禹穴記



禹穴在會稽山陰昔黃帝藏書處也禹治水至稽山得黃帝水經于穴中按而行之而後水土平故曰禹穴世莫詳其處或曰卽今陽明洞是已又云禹旣平水土會諸侯稽功于塗山尋崩遂葬于會稽之陰故山曰會稽穴曰禹穴至今窆石尚存或然也後二千餘年而司馬遷氏來探書禹穴歸而作史記文章煥然爲百代冠說者謂是山川之助也又後千餘年而晉安鄭善夫氏及山陰朱君節王君琥氏來復探禹穴尋黃帝藏書處乃玩梅梁摩挲窆石覩先聖王遺像得禹穴於菲井之上徘徊瞻眺想其卑宮而菲食爲之喟然興懷又想其執中用智與臯夔稷卨之爲臣又爲之憮然自失也夫自禹跡以後三千年間遊者不知其幾而惟司馬氏顯此山川之能發爲文章亦惟司馬氏夫三千年而僅得一人於山川顧止以文章顯何哉豈山川之能僅足以煥人文章邪世有不爲文章者於山川何取也自昔至人見轉蓬而造車觀游魚

而造舟得河圖而成卦因洛書而作範咸取諸物也子在川上曰逝者如斯夫不舍晝夜余乃今知所取於山川矣禮登高而賦余未能賦姑記余言如此云

石龍書院記

石龍書院在紫霄山中岑嶸修阻林木莽然豺虎聚之闢而居之者石龍黃子也黃子在京師時與王湛二子論聖學聞道之的乃期作室於幽深以候二子者共之余時居吳吳東南之衝也得多接士故得見黃子繼得見二子與聞所謂聖學者歆然自鄙其平生憤悱而歸杜門五載仍俵俵如也乃復出山走四方求所謂三子或有以成吾志者由是遵會稽探禹穴登陽明之廬無人焉由是東走天台南入雁蕩始復遇黃子于委羽之陽語平生驩甚黃子曰吾向所謂書院成矣遂偕處旬月晝談夕息余盡得聞所未聞於乎黃子其真成我之志者於乎此學自孔孟而後千餘年作者只濂洛數子其他役

志載籍揭日月而行者可勝論哉吾儕幸嗣絕  
響今者其會也然一念依違遂至沒世噫其可  
畏哉乃今欲於紛波中定慮更期三年裂冠而  
來子其虛榻候我揚子云在夷狄則進之在門  
庭則麾之余嗣是又不重有畏哉書院凡五間  
中爲凝道堂東曰賞幽西曰寓遠其窩曰虛白  
東軒曰天風西曰空翠曰石龍云者黃子之先  
在洞黃山下有湖有石如龍生湖底水枯輒見  
故云

### 遊北山記

北山去黃岩澄江六七里至山之樊巖石業崑  
有洞穹然曰小有空明天每風則聲從中出復  
曰天風門山以洞勝故復曰靈巖巖下有瀑其  
聲琤琤然注爲川昔朱晦翁與杜方山南湖講  
學其上以川之狀與樊川爲類故名曰小樊川  
後有杜清獻杜司農者起而張之故村曰杜村  
巖之上爲嶺曰招仙嶺東轉爲厓縣水百餘丈  
龍穴而淵曰龍厓厓下有亭曰二公亭上有谷

曰芝谷氣和則紫芝生之谷折而陁青壁崕呀  
泉涓涓出石罅爲少谷亭又西爲鷲峯峯益峻  
林木益翳凝紫出天畔北瞰赤城南臨雁蕩西  
望括蒼東極滄海之隩復名曰紫霄水甘如飴  
其源出峰頂一泓顯伏不常卽志所謂影迹潭  
是已莽蒼之交黃子書院在焉余時東遊訪黃  
子居再信遂定北山之約窮高極深復居再信  
時大雪壓山風蓬蓬振屋猿狖晝嘯熊兕夜號  
余與黃子披氅衣兀坐萬仞之表伐松枝燒楮  
樵叅訂周易仙仙如也於乎自余結髮遊名山  
川四美二難徃徃不相值間或相值矣其有如  
黃子者乎時艱歲徂窮荒遠海能使余安沈寥  
而忘羈栖者誰歟吾聞之馮危履艱以居仁也  
余遊北山於黃子得鍊性之道矣同遊者芝谷  
子空明山人亦城林益菴

思牧廳記

台州古稱風節之地其俗近朴其氣用剛其民  
易興以善義浙東西數郡浮萋繁華而台皆反

之及其敝也胥靡以偷胥成以訐一不相能至  
聚徒旅相攻擊訟纏拏裔不解接櫛死狴犴罔  
有悔者且風然曰豪哉豪哉狡猾之徒則延蔓  
爲宄愚黔黎治之急則糾黨與縛長吏緩則日  
就積弱至其君子則或決廉隅藩翰而爲之是  
故牧斯土者不曰民頑梗吾化也則曰吏奸蠹  
吾政也夫斯民也三代之英也豈今昔不相倫  
至此哉吾聞之牧人猶牧馬也和其唇吻順其  
恒度寬其銜勒時其食飲馬異類也固可馴之  
以驟馳而况人乎日其櫛飾鞭笞之法繁燒之  
刻之饑之渴之而曰世無良馬顧弗思已矣金  
陵顧君華玉挾才識志節爲令有聲徵爲天官  
郎久次出守開封忤奄柄謫居嶺表者三年始  
復遷茲土至則喟然思曰民敝久矣無他牧之  
無法也由是進父老而風之曰爾若赤子也若  
爾父母也以繼自今若與爾濯而新之不率者  
有憲勦兇振墮昭勸懲長廉耻政未及朞而六  
邑風歸郡故有燕居久就坵圯君經易櫪桶塲

飾粉堊參以瓦甍環以卉木旁有松數十株高可數百尺磐石巍岌可亭其上延遠風作虬龍聲或曰是松元至大間趙某所植者或然也時若風教未純俗未變民有乖戾君休衙舉燭坐其中於邑不懌小吏報曰漏已三鼓矣君曰吾方思吾旦所出者

漳州重新府治記

嘉靖二年春二月漳州府治成張子集案屬示厥成績前叅知周子某左理是邦贊厥具美請

憲諸貞石遂委役于少谷某附志業於二子者役無愛也禮匠人管邦五等其堂涂庭序廊廡開闢各有差以戒分也堂皆南嚮其崇脩數尋以臨明也有燕饗之堂以肅賓合案共議庶政其隅有室以退思過今之郡治卽古之侯國也漳州南衽海又控島夷實維雄邦三方皆連亘巖砦峒壑脩阻厭大兵其按制防虞之艱實不與他邦類先是漳之治弗治堂構櫨撓腐級甍四折其燕堂爲墟蝕于輿草門卷傾塌吏露處

是謂弗莊民之慢政且久也嘉靖改元張子假  
臺臣出牧于漳至則喟然曰夫土階旣遠明德  
新民是用莊以蒞者維茲弗治乃可以蒞乎於  
是乎度貲於郡倅杜君昂聶君仁郡提刑胡君  
宗道得請游粟若干石於是乎以七月載功以  
龍溪尉聶彥漳浦尉莫魯司征郭玉耆氓王虞  
煥以其能受勾會以南靖尉關鳳受陶旋平買  
百用凡石材瓴甌磁鍾楨幹絢堊之屬一時而  
登傭游民而役之七閱月而治成爲燕堂八楹

崇五仞六咫修十尋而上橫度九尺之筵十四  
之而下遷外帑於左周序蓋甃悉以石用杜寇  
灾名曰廣濟前爲堂治其漫漶鮮以白盛黃錯  
而繡綰堂東西爲卷二十楹南爲門二階三閤  
閤旣槩昭其觀也夫漳人營室其庀材最艱材  
出延建以海至輸轉率登于其直茲維始事也  
龍溪茶磴有靈石裂決漲木千章來會城下是  
困崖嶠十許禩者耆老驚曰自吾生於斯齒亂  
而豁未見此豈天將神之以相公之營耶之役

也貨出於游粟力傭於游民神相以材問之四人無厲者足以考君子之政矣古人云作室猶治身門堂寢室猶之四肢百骸也而吾中處猶心也門廡不治猶手足之不仁也手足不仁不累心乎哉古人掃滌舍宇正使心地清明明德新民一也張子之政蓋自心身之治而用之民者也高閑夷庭豈徒爲莊耶將使繼者覩其外思無歉於其內也張子諱鵬西川洪雅人爲侍御史激奸振滯見正德中云是年秋九月日某

記

福清縣復祥符陂記

嘉靖元年春正月福清縣復築祥符陂夏四月陂成始興水利也閩八郡其四徃海民之半鹽魚以生福清土益鹵海益患其田下下不蕃粟稷而蕃人故四人外給恒十之七八焉宋祥符中令郎簡相土可田者得五十頃而餘相水可渚者得二十里而餘於是乎疏請截江而堤廢民居百浚達而渠之引源於石湖之嶺導而界



江豬奔殺悍東抵於旗西臨於玉融南循於五  
馬北極於玉屏之隩所跨遵義永福永東西文  
興凡五區轉瘠卸鹵田化而上以始自祥符故  
曰祥符陂蓋噩乎其浸也洪武二十三年陂決  
文興潮殺稼越正統七年邑丞陸忠復之正德  
十三年陂決南臺大娘垠潮復殺稼民至是大  
敝明年海虞陳侯迨來又二年下令於邑中曰  
余爾牧也忍視爾敝敝今與爾復而陂以簿揚  
俟受稽畫曰而往監之凡田頃出十夫十頃出  
百夫約畝受力駢力宜勤沉以巨衝實以砂黃  
由是荷鍤執畚四人雲至量日齊工乃湮乃防  
田峻報程餉夫走饒甫三月而告成績由是變  
腴敷膏候氣執成江有恒流歲遂大有繼自今  
卽有炎嘯罔攸患由是鰥老黃孺呼抃謹躍舉  
曰陂之悠悠樂只有秋微侯之載齊民其亡瘳  
田是某某來致衆情請永憲於石水利禪荒  
政者也程伯子之上元朱晦翁之浙東塞決堤  
起涇堰古則王政也而時慢之侯今之舉無軼

代論世哉侯起甲科令海邑毅斷神察大宜厥  
官此其政之一也余知侯故樂序其績云

重修桂林文廟記

正德辛巳春三月桂林文廟成行釋菜禮畢善  
夫退而言曰我夫子道法百王功垂萬世孔門  
而下之所稱論其至矣余過闕里拜夫子遺像  
蓋得觀歷代帝王崇尚之典云凡祀法祀功自  
王都郡邑皆祀夫子其祀物與祀天並者夫子  
之功則天也桂林之祀何始乎始於宋省元潘  
枋廟成墀下茁二桂因名曰桂林祀有田鄉社  
行之不廢成化間桂復茁墀下郡太守唐侯珣  
因益田若干歲久廟圯鄉耆宿某等復聚而仍  
之增四配享復益田若干祀枋牖下以枋首事  
也今之佛老之教比之六經豈啻燬火於大明  
也今六經行天而燬火亦然者何哉夫子不攻  
異端而異端廢孟子攻楊墨而楊墨廢後儒無  
夫子之道孟子之辯使佛老蔓及於後世至明  
王之法不能制焉傷哉明法凡郡邑許一寺一

觀備祈禳也今天下之鄉社虔於所事至與食  
飲同要雖明知者不免其故何也孟子云能言  
距楊墨者聖人之徒也坊始爲之至化其鄉不  
爲佛老而專事夫子在祀法亦當血食其社也  
故既祀夫子亦尸祀之云董事者某某益田者  
某某祠部員外郎鄭善夫撰

周太僕遇寇事記

辛未春三月山西行太僕卿周公某如太原遇  
賊於朝歌變至今妻子總垣而避之賊執公需  
馬射公中脅公劊甚正冠堂上抱 天子誥勅

矢死以委之時脅者自至公亡屈也俄有朱千  
戶者渠魁也覩公蕭其鄙曰朝廷大官何得無  
禮劫公行不可曰不去羣小無知慮有奇巧時  
縣尉曹安亦在虜中固請從之賊重公居之樓  
上命王者爲食覓醫爲藥其所以尊而衛之者  
甚周公意其無他也以義讓之賊焯然起曰吾  
豈願至此哉吾爲賊瑾驅耳公曰瑾旣戮曷不  
改圖曰嘻吾無生之門矣旣而糾其黨去之謂

曹安曰吾不趾此城者爲好官在也而謹護之  
公妻子旣出亡及牧有夏生者迎而施舍焉於  
是乎俱免於難噫奇哉余時正阻兵淮北實詳  
公顛末以爲變亂中美談且聞公所以滅賊之  
策於人人扼腕久之山東羣盜不過狗鼠之雄  
耳身無頓師無律烏合而起志不在大也壤鄰  
相驅乃醞此大患 朝廷鑿凶門命將出師散  
中帑錢幣不下數百萬連五六年而卒借徼外  
之兵然而山東西兩川河淮南北城陷者十三  
死者十五僵尸成丘流血成川使天不悔禍有  
隱憂者矣 國家養士百餘年縻以好爵裕以  
重祿章縫之流平居長節亢言炎炎一旦倉卒  
棄城逃生甚有鬻陳賈敵以僥其身者吾見其  
人矣介胄之士食恩累世積威蓄銳以俟用於  
一朝迺聞風而靡猶參芻者忘意於膏梁卒見  
鼷鼠反怖而遁也否則幸禍以徼功養釁以邀  
賞視芟民命猶棄草菅然彼何心也哉

雲溪記

吳楚之東浙之西去海百數十里曰吳興厥土  
曠夷無連峯巨藪山蔚特翦蒼蒼蛇行不數里卽  
斷而原不能伏虎豺茗雪二水洄其際雪水源  
出吉州諸山茗水出武康西北流二百餘里道  
吳興或滙或渴爲浜爲俾而後東瀦于大湖水  
皆安恬無四序涸溢昕夕可方舟自茗東折派  
爲小淑曰雲溪名不見圖志或曰是溪辟囂去  
煩所見者白雲而已或曰隱者與雲爲伍溪故  
多隱君子與吳越之交風淳而土腴且宜蠶作  
民易以爲生其山棲淵伏也無風波豺虎之恐  
故世之隱君子多托焉而藏於漁畔也溪之潯  
麗菱芡葭草美竹箭有柴門面溪上屋數間桑  
柘數百株逶迤紆回蓋觀察副使張公水居也  
始公羈貫時釣游是溪凡三十年出而料理天  
下事又凡三十年髮已種種乃得歸是溪茲者  
畢志於白雲之表與嘗怪蘇子瞻惡居西夷買  
田宜興又疏請居浙竟以人事宦情違志樂土  
固靳於與人耶余避人海上稍厭蠻俗不免有

風波虎豹之恐欲謀避地而力苦不可於公之歸是溪也不無注深思云

### 鳳陽記

下龍門東入迥溪六七里百折至衡山溪門漸狹水漸融溪又東二里有山巖然如鳳形其名曰鳳峯又曰鳳陽入凰之西曰西上有登龍故碑泯歲月下有廢宅畔者據之相傳宋丞相鄭魏公避地處也或曰莊也其旁多古塚又西半舍曰聖洞委蛇幽深天欲雨則煙雲從其中出吾先子嘗曰鳳陽可以返吾真也既而先子沒先夫人亦沒善夫用治命卜西上之原築爲塋徙故碑於道左而新之勒年月及先子姓號於其上結廬以守勤所志也曰青山如故時之化如斯廢宅荒塚而昔且如今吾安知吾後殊今所見後吾者攬斯文而化思見見聞聞相繩以傍之無窮庶凰陽其不丘墟哉庚午臘月日記

### 春雨遊大石記

大石在陽山之西四五里欽危峻拔特出衆巖

跨者爲梁卧者爲几峻而立者爲丈人登之者  
非攀援弗克下有流泉風雨則其聲淙淙然泉  
石之交有松數株盤屈偃蹇若虬龍然旁皆椽  
竹拱木鬱不可數中有菴曰雲泉或曰以其石  
之潤而雲澤而泉也或曰以泉流雲也吳中山  
皆土少石有亦不能奇惟陽最多惟雲泉最奇  
故曰大石今年春予有事游墅游墅詎石邇而  
未能卽往也三月朔崑山令方豪氏過予予方  
病肺得豪則甚驩言大石則又甚驩時且雨遂  
汎舟聯句抵石又得王龍臣益驩且出肴酒酌  
梅花下復聯句至夜分時羣動聞寂但聞所謂  
淙淙然者脫然有遊仙之想又於枕上各賦詩  
合若干首明日晴乃策竹上絕頂盼太湖及洞  
庭諸峯鐫姓名歲月于石而後返

夜遊虎丘記

自大石歸方子興未竟余病且間復登虎丘日  
入戒行月入告至時暮雲未歸夜月不生山川  
之境陵谷之態閭閻然若韜其靈秀而不售也

迺挾奚奴曳輕裾秉燭前導列爲火城轉於中  
亭踞千人石藉草而坐取憨泉而飲尋至劍池  
取闔閭神道不獲又以燈取石崖上古今人陳  
迹又緣法堂入千頃雲閣取壁門韻賦詩詩成  
僧大泉具清齋白飯對嚼而歸世之高興者有  
如吾二人哉噫吾之興高而感亦大也方子爲  
崑山彊二年而六至吾十年于外至者再今此  
則偕方子也前此非方子也方子亦非吾偕也  
後此者而復誰偕哉吾與方子踪跡蓋未定也  
後吾游者亦或有以感吾感正德七年春三月  
二日記

賓陽樓記

浙東數州栝最遠而天台而雁宕而三衢而金  
華周千里皆山栝最峻由栝東南遡湍流而上  
二百五十里曰青田山益峻地益遠民益野雖  
有學校之教才則鮮也 朝廷考學官之成視  
人才之有無多寡以上下其績故得是地則快  
快然入是地則靡靡然至於殿堂之傾圮邊俎



之廢缺禮樂之崩壞弗念也正惠三年閩進士  
張子某爲之至則大有憂曰是豈人才之不縣  
於教而故限於地耶是豈殿堂籩俎禮樂之類  
不足以飾教耶吾人敝之病也首治先師殿廡  
次葺泮宮次表鄉賢而祠之次新祭器次講諸  
禮儀乃復集多士議建宗文樓鈞材於梵因力  
於天哀貲於衆厥日維良厥位維東厥堂維巽  
維三月樓成乃自命曰賓陽以爲諸生問學之  
地名本諸書而義則取諸易也易曰日出地上  
晉君子以自昭明德士之登斯樓者顧名思義  
將有所激而興者乎夫其有思也必有興也人  
而思人而興則青田人才殆自茲樓富矣然則  
張子之爲之也固在殿堂籩俎禮樂之外也

鄭少谷先生全集卷十

